



INFORMASHON GENERAL MANEHO DI PROPAGANDA

Den ki forman por pone propaganda den área públiko??

- Parti paden òf pafó di un edifisio, òf riba un konstrukshon, sea ta un edifisio òf un otro sorto di konstrukshon (sea ta riba tereno privá òf den área públiko), i visibel for di área públiko. Por ehèmpel: propaganda riba fachada, “billboards”, propaganda di fèrf, konstrukshonnan òf murayanan destiná pa plak propaganda, propaganda den un edifisio ku ta visibel via porta òf bentana.
- Un konstrukshon pará riba su kurpa, manera un bòrchi di propaganda (sea ta riba tereno privá òf den área públiko) i kual ta visibel for di área públiko. Por ehèmpel: bòrchi di propaganda, “billboards”, “pènel”, propaganda di fèrf, konstrukshonnan destiná pa plak propaganda, opheto ku propaganda stashoná den laira.
- Na un opheto móbil, kual ta visibel for di área públiko. Por ehèmpel: “sandwichbord”, bandera, propaganda riba mobilario públiko òf mobilario privá, propaganda móbil riba un vehíkulo òf un boto.
- Tambe nòmber di negoshi, logo, símbolo, bandera, pankarta, bòrchi di menú, propaganda pegá na glas di un tienda i ku visibel for di área públiko.

E propaganda mester kumpli ku kua eksigensianan?

E propaganda no tin mag di:

- kousa daño físiko na kaya òf ophetonan den área públiko,
- forma un estorbo pa e uso efisiente di área públiko,
- opstakulisá e aksesibilidat di e área públiko,
- forma un opstákulo pa siguridat den tráfiiko,
- stroba e mantenshon di e área públiko,
- forma molèster òf sushedat,
- hasi daño na e bista di e área públiko,
- tin un kontenido ofensivo, skandaloso òf violento (hende sunú, sèks, rasismo, arma, etc.),

Bo ke pone propaganda den área públiko?

1. Segun e lei di Òrdu Públiko, ta prohibí pa pone propaganda den- òf visibel for di área públiko. P'esei bo mester haña un eksonerashon.
2. Segun e lei di Òrdu Públiko, pa pone ophetonan den, riba, na kaya públiko bo mester di un pèrmit.

Es desir, pa pone un opheto ku den área públiko ku tin propaganda riba dje, bo mester di un eksonerashon i un pèrmit.

Petishonnan pa un eksonerashon òf un pèrmit mester wòrdu entregá na Servisio pa Planifikashon Urbano (ROP).

Pa un pèrmit bo mester paga leges i pa hasi uso di tereno òf awa públiko bo mester paga prekario.

Pa kua propaganda bo no tin mester di un eksonerashon òf pèrmit?

- Propaganda riba un edifisio òf tereno pa produktonan ku ta ser produsí òf bendí den e edifisio òf riba e tereno, òf negoshi ku ta ser praktiká einan.
- Un bòrchi ku anunsio di: Ta Bende/Ta Hür, ku un superfisie máksimo di 1,5 m².
- Un bòrchi temporal na un sitio di konstrukshon ku ta duna informashon tokante e proyekto, basta e bòrchi no ta iluminá.
- Propaganda temporal, pa entre otro un evento, basta e propaganda ta kumpli ku e eksigensianan i no ta wòrdu di plak òf marká ku kreit òf ferf, etc. riba superfisio di kaya públiko òf riba edifisionan, i basta e wòrdu kitá dentro di 24 ora despues di e evento. Den e kaso aki mester manda un notifikashon por eskrito na ROP, por lo ménos seis siman promé ku pone e propaganda, i dentro di 3 siman despues di a risibí e notifikashon, lo pone bo na altura si tin un òf otro opheshon kontra e propaganda en kuestion (wak e foyeto “Propaganda pa Evento” pa mas informashon).

- Propaganda en konekshon ku elekshon, basta pone e propaganda solamente dentro di e periodo kuminsando for di dia di entrega di lista te ku ocho dia despues di elekshon (wak e foyeto “Propaganda pa Elekshon” pa mas informashon).

Pero sí Minister por informá e doño por eskrito si tin opheshon kontra e propaganda, pa motibu ku e ta tacha bienestar públiko òf e no ta kumpli ku e eksigensianan tokante midí.

E notifikashon por eskrito òf e petishon pa un eksonerashon òf pèrmit mester kumpli ku kua eksigensianan?

E notifikashon mester kontené en todo kaso:

- nòmber di e kompania òf instansha, inkluyendo e number di Kámara di Komersio,
- nòmber i kopia di identifikashon di e persona di kontakto,
- adrès, number di telefon i e-mail adrès,
- den kaso di un outorisashon: kopia di esaki, no mas ku 3 luna bieu,
- den kaso di propaganda temporal: periodo di e kampaña (fecha te ku...) i kopia di e pèrmitnan nesesario pe evento,
- dibuho/imágen di e ophetonan di propaganda (eskala 1:100) ku e forma di propaganda, indikashon di e teksto i imágen di e propaganda, e materialnan i kolónan ku lo ser usá, e kantidat di opheto di propaganda, e manera ku lo instalá/pega nan, i indikashon di e lugá(nan) kaminda lo pone propaganda (“situatieschets” eskala 1:1000),
- prueba di derecho en konekshon ku e opheto móbil (teras, trùk di pan, etc.) òf e opheto inmóbil (edifisio òf tereno) riba kua lo pone e propaganda.

E notifikashon por eskrito òf e petishon pa un eksonerashon òf pèrmit mester komprendibel, kompleto i korekto, pa e por ser evaluá na ROP.

Prosedura

Un petishon pa un eksonerashon òf pèrmit ta wòrdu tratá mas lihé posibel, pero pa mas tardá 8 siman despues di entrega di e petishon.